

Malaysia, Arab Saudi jalin kerjasama hadapi cabaran pendidikan abad ke 21

AstroAwani

04 November 2019

KUALA LUMPUR: Malaysia bakal menerima guru-guru Bahasa Inggeris, Matematik dan Sains dari Arab Saudi sebagai sebahagian usaha membantu melatih guru-guru dari negara penjaga Tanah Suci itu untuk mempersiapkan sistem pendidikannya dalam mendepani cabaran pendidikan abad ke 21.

Perkara berkenaan merupakan antara ketetapan yang diperoleh hasil pertemuan Menteri Pendidikan Maszlee Malik dan Menteri Pendidikan Arab Saudi, Dr Hamad bin Mohammed Al Shaikh, jelas Kementerian Pendidikan menerusi satu kenyataannya hari ini.

"Guru-guru mereka (Arab Saudi) daripada tiga subjek iaitu English, Matematik dan Sains akan dihantar ke Malaysia bagi mendapatkan pengalaman mengajar di sini," maklum Kementerian Pendidikan.

Hasil daripada pertemuan berkenaan juga, Arab Saudi bersetuju untuk memberikan 300 biasiswa kepada mahasiswa Malaysia dalam bidang sains dan teknologi.

“Malaysia amat menghargai kesungguhan Arab Saudi dalam perbincangan berkenaan dan yakin kerjasama ini merupakan sebahagian daripada usaha untuk mengukuhkan hubungan baik kedua-dua negara,” jelas Kementerian Pendidikan.

Pada Ahad, Raja Arab Saudi, Raja Salman Abdulaziz Al Saud menerima menghadap Maszlee selaku utusan khas Perdana Menteri, Tun Dr Mahathir Mohamad.

Ketika menghadap, Maszlee menyembah maklum isu-isu berkaitan melibatkan kedua-dua negara termasuk yang melibatkan kerjasama dalam bidang pendidikan.

© 2019 AstroAwani Network Sdn. Bhd.

(535275-D) All Rights Reserved.

Source: <http://www.astroawani.com/berita-malaysia/malaysia-arab-saudi-jalin-kerjasama-hadapi-cabaran-pendidikan-abad-ke-21-221756>